

漢書門

類	二五八六	號	九	函	六一	架	六二	冊
---	------	---	---	---	----	---	----	---


內閣文庫

類	二五八六	號	六二	冊	二	函	二七四
---	------	---	----	---	---	---	-----

內閣文庫

番號	漢	11586
冊數	62	(42)
函號	274	82





祭祀之禮本紀二

祭典

祭義

祭主

祭帝于郊。所以定天位也。祀社于國。所以列地利也。祖廟所以本仁也。山川所以儆鬼神也。五祀所以本事也。

禮行於郊。而百神受職焉。禮行於社。而百貨可極焉。禮行於廟。而孝慈服焉。禮行於五祀。而正法則焉。有虞氏禘黃帝而郊。魯祖顓頊而宗。堯夏后氏亦禘黃帝而郊。鯀祖顓頊而宗。禹殷人禘魯而郊。冥祖契而宗。湯周人禘魯而郊。稷祖文王而宗。武王

燔柴於泰壇。祭天也。瘞埋于泰圻。祭地也。埋少牢于泰昭。祭時也。祖迎于坎壇。祭寒暑也。王宮。祭日也。夜明。祭月也。幽宗。祭星也。雩宗。祭水旱也。四坎壇。祭四方也。非此族也。不在祀典。

天子祭天地。祭四方。祭山川。祭五祀。歲徧。諸侯方祀。祭山川。祭五祀。歲徧。大夫祭五祀。歲徧。士祭其先。王立七祀。曰司命中。雷國門。國行。泰厲。戶。竈。諸侯五祀。曰司命中。雷國門。國行。公厲。大夫三祀。曰族厲。門。行。適士二祀。曰門。行。庶士。庶人一祀。或戶。或竈。

聖王之制祭祀也。法施于民。則祀之。以死勤事。則祀之。以勞定國。則祀之。能禦大菑。則祀之。能捍大患。則祀之。

凡祭有其廢之。莫敢舉也。有其舉之。莫敢廢也。非其所祭而祭之。名曰淫祀。淫祀無福。

惟聖人爲能饗帝。孝子爲能饗親。外祭則郊社是也。內祭則大嘗禘是也。君子之祭也。必身自盡也。君子之教人也。必由其本。祭者教之本也。

賢者之祭也。必受其福。福者備也。備者百順之名也。上順于鬼神。外順于君長。內孝于親。如此之謂備。惟賢者能備。能備然後能祭。

君子非有大事則不齊。非有恭敬則不齊。及其將齊也。防其邪物。訖其耆欲。專致其精明之德也。

魯人將有事于上帝。必先有事于頰宮。晉人將有事于河。必先有事于惡池。齊人將有事于泰山。必先有事于配林。三月繫。七日戒。三日宿。慎之至也。祭有所祈焉。有報焉。有由辟焉。

夏后氏祭其闇。殷人祭其陽。周人祭日以朝及闇。

酒醴之美。玄酒明水之尚貴。五味之本也。黼黻文繡

之美。疏布之尚反。女功之始也。莞簞之安。而蒲越藁

鞞之尚明之也。大羹不和。貴其質也。大圭不琢。美其

質也。丹漆雕幾之美。素車之乘。尊其樸也。

祭有三重。獻之屬莫重于裸。聲莫重于升歌。舞莫重

于武宿夜。

祭有十倫。見事鬼神之道焉。見君臣之義焉。見父子

之倫焉。見貴賤之等焉。見親疎之殺焉。見爵賞之施

焉。見夫婦之別焉。見政事之均焉。見長幼之序焉。見上下之際焉。

夫祭也者。必夫婦親之。所以備內外之官也。官備則具備。水草之菹。陸產之醢。小物備矣。三牲之俎。八簋之實。美物備矣。昆蟲之異。草木之實。陰陽之物備矣。凡天之所生。地之所長。莫不成在。示盡物也。外則盡物。內則盡志。

祭有畀。輝庖翟闈者。惠下之道也。惟有德之君。爲能行此。輝者。甲吏之賤者也。庖者。肉吏之賤者也。翟者。

樂吏之賤者也。闈者。守門之賤者也。尸至尊。以至尊。既祭之末。而不忘。至賤。而以其餘畀之。故明君在上。則竟內之民。無凍餒者矣。此之謂上下之際。

餼者。祭之末也。不可不知也。古之人曰。善終者如始。餼其是已。君子曰。尸亦餼鬼神之餘也。惠術也。可以觀政矣。是故尸饗。君與卿四人餼。君起。大夫六人餼。臣餼。君之餘也。大夫起。士八人餼。賤餼。貴之餘也。士起。各執其具。以出陳于堂下。百官進徹之。下餼。上之餘也。凡餼之道。每變以衆。所以別貴賤之等。而興施。

惠之象也。祭者澤之大者也是故。上有大澤則民夫
 人待于下流。知惠之必將至也。由餽見之矣。故曰可
 以觀政矣。故廟中者竟內之象也。
 庶羞不踰牲。燕衣不踰祭服。寢不踰廟。大夫祭器不
 假。祭器未成不造燕器。
 祭祀不祈不麾蚤。不樂葆。大不善嘉事。牲不及肥大。
 薦不美多品。
 俎者所以明祭之必有惠也。俎以骨為主。骨有貴賤。
 殷人貴髀。周人貴肩。貴者取貴骨。賤者取賤骨。貴者

不重。賤者不虛。示均也。惠均則政行。
 鼎俎奇而籩豆偶。陰陽之義也。
 天子諸侯必有養獸之官。及歲時齋戒沐浴而躬朝
 之。擇其毛而卜之。吉養之。
 天子以犧牛。諸侯以肥牛。大夫以索牛。士以羊豕。
 支子不祭。祭必告于宗子。
 無田祿者不設祭器。有田祿者先為祭服。
 君子將營宮室。宗廟為先。家造祭器為先。
 祭服敝則焚之。祭器敝則埋之。龜筮敝則埋之。牲死

則理之。

君子雖貧不粥祭器。雖寒不衣祭服。爲宮室不斬于丘木。

餽餽不祭。父不祭子。夫不祭妻。

因物之精制爲之極。明命鬼神以爲黔首。則百衆畏。萬民服。

當祭而日食。大廟火。其祭也如何。曰接祭而已矣。如牲至未殺則廢。

大夫之祭。鼎俎既陳。籩豆既設。不得成禮。廢者幾。子

曰九。天子崩后之喪。君薨。夫人之喪。君之大廟火。日食。三年之喪。齊衰大功。皆廢。

禮有五經。莫重於祭。夫祭者非物自外至者也。自中出生於心者也。心怵而奉之以禮。是故惟賢者能盡

祭之義。

喪三年不祭。惟天地社稷爲越。紼而行事。不敢以卑廢尊也。

嘗之日。涖卜來歲之芟。獮之日。涖卜來歲之戒。社之日。涖卜來歲之稼。

醴酒在室。醕酒在堂。澄酒在下。故堂上觀乎室。堂下觀乎上。

祭天以煙爲歆神之始。以血爲陳饌之始。祭地以埋爲歆神之始。以血爲陳饌之始。宗廟以灌爲歆神之始。以腥爲陳饌之始。然則天地宗廟皆以樂爲致神之始。故曰大祭有三始。

孔子曰。三日齋。一日用之。猶恐不敬。二日伐鼓。何居。孔子曰。繹之於庫門內。祊之於東方。朝市之於西方。失之矣。

孔子曰。臧文仲安知禮。夏父弗綦逆祀而弗止也。燔柴于奧。夫奧者老婦之祭也。盛于盆。尊于瓶。

孔子曰。誦詩三百。不足以一獻。一獻之禮。不足以大饗。大饗之禮。不足以大旅。大旅具矣。不足以饗帝。母輕議禮。

子路爲季氏宰。季氏建閭而祭。日不足繼之以燭。雖有強力之容。肅敬之心。皆倦怠矣。有司跛倚以臨祭。其爲不敬大矣。他日祭。子路與室事交乎戶。堂事交乎階。質明而始行事。晏朝而退。孔子聞之曰。誰爲由。

也而不知禮乎。

有神降於莘。王問內史過曰：「是何故？」對曰：「國將興，其君齊明，衷正精潔，惠和其德，足以昭馨香，其惠足以同民人，神饗而民聽，民神無怨，則明神降之，觀其政德而均布福焉。國將亡，其君貪曷，辟邪滌佚，荒怠麓穢，其政腥臊，馨香不登，其刑矯誣，百姓攜貳，明神弗蠲而民有遠志，民神怨痛，無所依懷，故神亦往焉。觀其苛慝而降之禍，是以或見神以興，亦或以亡。」

宮之奇告虞公曰：「鬼神非人實親，惟德是依。故周書

曰：皇天無親，惟德是輔。又曰：黍稷非馨，明德惟馨。又曰：民不易物，惟德絜物。如是則非德，民不和，神不享矣。神所馮依，將在德矣。」

史嚚曰：「吾聞之國將興，聽於民；將亡，聽于神。神聰明正直而壹者也，依人而行。」

衛遷于帝丘。衛成公夢康叔曰：「相奪予享，公命祀相。甯武子不可，曰：『鬼神非其族類，不歆其祀。』杞鄆何事，相之不享於此久矣，非衛之罪也，不可以間成王周公之命祀。」

初楚昭王有疾。卜曰：河爲祟。王弗祭。大夫請祭之。郊。王曰：三代命祀，祭不越望。江漢睢章，楚之望也。福禍之至，不是過也。不穀雖不德，河非所獲罪也。遂弗祭。孔子曰：楚昭王知大道矣。其不失國也宜哉。史趙曰：盛德必百世祀。穀梁曰：宮室不設，不可以祭。衣服不修，不可以祭。車馬器械不備，不可以祭。有司一人不備其職，不可以祭。祭者薦其時也。薦其敬也。薦其美也。非享味也。太祝掌六祝之辭：一曰順祝，二曰年祝，三曰吉祝，四

曰化祝，五曰瑞祝，六曰筴祝。掌六祈以同鬼神示：一曰類，二曰造，三曰禴，四曰禘，五曰攻，六曰說。作六辭以通上下親疎遠近：一曰詞，二曰命，三曰誥，四曰會，五曰禱，六曰誅。辨六號：一曰神號，二曰鬼號，三曰示號，四曰牲號，五曰齋號，六曰幣號。辨九祭：一曰命祭，二曰衍祭，三曰炮祭，四曰周祭，五曰振祭，六曰擯祭，七曰絕祭，八曰繚祭，九曰共祭。

辨九拜。一曰稽首。二曰頓首。三曰空首。四曰振動。五曰吉拜。六曰凶拜。七曰奇拜。八曰褒拜。九曰肅拜。以享右祭祀。

祭祀之禮本紀三

郊

社

宗廟

郊之祭也。迎長日之至也。大報天而主日也。

兆于南郊。就陽位也。掃地而祭于其質也。器用陶匏。

以象天地之性也。於郊故謂之郊。

牲用騂。尚赤也。用犢。貴誠也。郊之用辛也。周之始郊。

日以至。

卜郊。受命于祖廟。作龜于禰宮。尊祖親考之義也。

卜之日。王立于澤。親聽誓命。受教諫之議也。獻命庫。

門之內。戒百官也。大廟之命。戒百姓也。

祭之日。王皮弁以聽祭報。示民嚴上也。喪者不哭。不敢凶服。汜埽反道。鄉為田燭。弗命而民聽上。祭之日。王被衮以象天。戴冕璪。十有二旒。則天數也。乘素車。貴其質也。旂十有二旒。龍章而設日月。以象天也。天垂象。聖人則之。郊所以明天道也。上帝之牛角。鬻粟必在滌。三月后稷之牛。惟具。所以別事天神與人鬼也。萬物本乎天。人本乎祖。此所以配上帝也。郊之祭也。大報本反始也。

郊祀后稷。以祈農事。是故啓蟄而郊。郊而後耕。郊則曷為必祭稷。王者以其祖配。郊血。大饗腥。三獻爛。一獻孰。郊之祭。大報天而主日。以配月。祭日于壇。祭月于坎。以別幽明。以制上下。祭日于東。祭月于西。以別內外。以端其位。孟春之月。天子乃以元日。祈穀于上帝。孟冬。天子乃祈來年于天宗。大宗伯以禋祀。祀昊天上帝。以實柴。祀日月星辰。以

禋燎祀司中司命。觀師雨師。

典瑞圭璧以祀日月星辰。

牧人九陽祀用騂牲毛之。

鬯人掌共秬鬯而飾之。

酒政以法共五齊三酒以實八尊。大祭三貳。

天府祭天之司民司祿。獻民數穀數則受而藏之。

小司寇孟冬祀司民。獻民數于王。

因天事天。因地事地。因名山升中於天。因吉土以饗

帝於郊。升中於天。而鳳凰降。龜龍假。饗帝於郊。而風

雨節。寒暑時。

王為羣姓立社。曰大社。王自為立社。曰王社。諸侯為

百姓立社。曰國社。諸侯自為立社。曰侯社。大夫以下

成羣立社。曰置社。

社祭土。而主陰氣也。君南鄉于北墉下。答陰之義也。

日用甲。用日之始也。

天子太社。必受霜露風雨。以達天地之氣也。是故喪

國之社。屋之不受天陽也。薄社北牖。使陰明也。

社所以神地之道也。地載萬物。天垂象。取財于地。取

法于天。是以尊天而親地也。故教民美報焉。
家主中霤而國主社。示本也。惟爲社事。單出里。惟爲
社田。國人畢作。惟社丘乘供粢盛。所以報本反始。
厲山氏之有天下也。其子曰農。殖百穀。夏之衰也。周
弃繼之。故祀以爲稷。共工氏之霸九州也。其子曰后
土。能平九州。故祀以爲社。
地官大司徒。設社稷之壇。樹之田主。各以其野之所
宜木。名其社與野。
小司徒。凡建邦國。立社稷。

封人。掌詔王之社壇。爲畿封而樹之。
州長。以歲時祭祀州社。
大宗伯。以血祭社稷。
小宗伯。掌建國之神位。右社稷而左宗廟。
大師。帥有司立軍社。奉主車。
天子社稷皆太牢。諸侯社稷皆少牢。
仲春之月。擇元日命民社。
天子立七廟。三昭三穆。與太祖之廟七。太祖近廟。皆
月祭之。遠廟爲祧。有二祧焉。享嘗乃止。諸侯五大夫

三適士二官師一庶士庶人無廟四時祭于寢
 王立七廟一壇一墀曰考廟曰王考廟曰皇考廟曰
 顯考廟曰祖考廟遠廟為祧去祧為壇去壇為墀去
 墀為鬼
 指之廟立之主曰帝
 禮不王不禘王者禘其祖之所自出以其祖配之
 祭皇父曰皇祖考王母曰皇祖妣父曰皇考母曰皇
 妣夫曰皇辟
 大宗伯裸享先王春曰禘夏曰禘秋曰嘗冬曰烝

小宗伯辨廟祧之昭穆
 守祧掌先王先公之廟祧若將祭其廟則有司修除
 之其祧則黜聖之其遺衣服藏焉將祭則授尸
 隸僕掌五寢埽除糞灑之事祭祀修寢
 小吏掌邦國之志奠繫世辨昭穆若有事則詔王之
 忌諱
 天府掌祖廟之守藏與其禁令祭則出而陳之既事
 藏之上春釁玉鎮及寶器若遷寶則奉之
 天子牲禘祫禘祫嘗祫烝諸侯禘則不禘禘則不嘗

嘗則不烝。烝則不祔。孫可為皇父。尸子不可為父。尸孫幼則使人抱之。無孫則取于同姓可也。孫為王父。尸于祭者子行也。父北面而事之。所以明子事父之道也。夏立尸而卒祭。殷坐尸。周旅酬六尸。曾子曰。周禮其猶醪與。尸無事則立。有事而後坐。尸神象也。祝將命也。縮酌用茅。明酌也。明水。澆齊。鬯新也。

尸飲五。君洗玉爵獻卿。尸飲七。以瑤爵獻夫人。尸飲九。以散爵獻士及羣有司。君迎牲而不迎尸。別嫌也。尸在廟門外則疑于臣。在廟中則全于君。君在廟門外則疑于君。入廟門則全于臣。全于子。氣也者。神之盛也。魄也者。鬼之盛也。合鬼與神教之至也。燔燎羶薌。見以蕭光。以報氣也。薦黍稷。羞肝肺首心。覲以俠。瓠加以鬱鬯。以報魄也。

魂氣歸于天。形魄歸于地。故祭求諸陰陽之義也。殷人先求諸陽。周人先求諸陰。詔祝于室。坐尸于堂。用牲于庭。升首于室。直祭祝于主。索祭祝于祊。不知神之所在。于彼乎。于此乎。或遠諸人乎。祭于祊。尚曰。求諸遠者與。納牲詔于庭。血毛詔于室。羹定詔于堂。三詔皆不同。位蓋道求而未之得也。一獻質。三獻文。五獻察。七獻神。樂以迎來。哀以送往。故禘有樂。而嘗無樂。

有虞氏之祭也。尚用氣。血腥爛祭。用氣也。殷人尚聲。臭味未成。蕩滌其聲。樂三闋。然後出迎牲。聲音之號。所以詔告于天地之間也。周人尚臭。臭陰達于淵泉。灌以圭璋。既灌。然後迎牲。致陰氣也。蕭合黍稷。臭陽達于墻屋。故既奠。然後炳蕭合羶薌。散齊七日。致齊三日。君致齊于外。夫人致齊于內。然後會于太廟。君純冕。立于阼。夫人副禕。立于東房。君執圭。瓚裸尸。太宗執璋。瓚亞裸。及迎牲。君執紉。卿大夫從。士執芻。宗婦執盎。從。夫人薦滄水。君執鸞。刀羞。

齊夫人薦豆。此之謂夫婦親之。及入舞宮。執干戚。就舞位。君為東上。冕而總干。率其羣臣以樂皇尸。是故天子之祭也。與天下樂之。諸侯之祭也。與境內樂之。玄酒在室。醴醕在戶。粢醢在堂。澄酒在下。陳其犧牲。備其鼎俎。列其琴瑟管磬鐘鼓。修其祝嘏。以降上神。與其先祖。以正君臣。以篤父子。以睦兄弟。以齊上下。夫婦有所。是謂承天之祐。致齊于內。散齊于外。齊之日。思其居處。思其笑語。思

者。其志。意思其所樂。思其所嗜。齊三日。乃見其所為齊者。祭之日。入室儼然。必有見乎其位。周還出戶。蕭然必有聞乎其容聲。出戶而聽。愾然必有聞乎其歎息之聲。祭不欲數。數則煩。煩則不敬。祭不欲疏。疏則怠。怠則忘。是故君子合諸天道。春禘秋嘗。霜露既降。君子履之。必有悽愴之心。非其寒之謂也。春雨露既濡。君子履之。必有怵惕之心。如將見之。

孝子將祭。必有齊莊之心。以慮事。以具服物。修宮室。治百事。及祭之日。顏色必溫。行必恐。如懼不及愛。然其奠之也。容貌必溫。身必詘。如語焉而未之。然宿者皆出。其立卑靜以正。如將弗見。然及祭之後。陶陶遂遂。如將復入。然是故。慤善不違身。耳目不違心。思慮不違親。結諸心。形諸色。而術省之。孝子將祭。慮事不可以不豫。比時具物。不可以不備。薦俎豆。序禮樂。備百官。于是諭其志意。以其恍惚與神明交。

孝子之祭。其立也敬。以詘。其進也敬。以愉。其薦也敬。以欲。退而立。如將受命。已徹而退。敬齊之色。不絕于面。立而不詘。固也。進而不愉。疏也。薦而不欲。不愛也。退立而不如受命。敖也。已徹而退。無敬齊之色。忘本也。如是而祭。失之矣。致愛則存。致慤則著。君子生則敬。養死則敬。享。禘嘗之義大矣。明其義者君也。能其事者臣也。天道至教。聖人至德。廟堂之上。壘尊在阼。犧尊在西。

廟堂之下。縣鼓在西。應鼓在東。君在阼。夫人在房。大明生於東。月生於西。此陰陽之分。夫婦之位也。君西酌犧象。夫人東酌鬯尊。禮交動乎上。樂交動乎下。和之至也。

籩豆之薦。水土之品也。不敢用常饗味。而貴多品。所以交於神明之義也。先王之薦。可食也。而不可耆也。卷冕路車。可陳也。而不可好也。武壯而不可樂也。宗廟之威。而不可安也。宗廟之器。可用也。而不可便其利也。所以交於神明者。不可同於所安樂之義也。

古者于禘也。發爵賜服。順陽義也。于嘗也。出田邑。發秋政。順陰義也。

凡飲養陽氣也。食養陰氣也。故春禘而秋嘗。春饗孤子。秋食耆老。其義一也。飲養陽氣。故饗禘有樂。食養陰氣。故食嘗無樂。

作其祝號。玄酒以祭。薦其血毛。腥其俎。熟其殽。醴醢以獻。薦其燔炙。君與夫人交獻。以嘉魂魄。是謂合莫。然後退。而合烹。體其犬豕牛羊。實其簋籩。籩豆。鉶羹。祝以孝告。嘏以慈告。是謂大祥。

君牽牲。夫人奠盎。君獻尸。夫人薦豆。卿大夫相君。命婦相夫人。洞洞乎其敬也。屬屬乎其忠也。勿勿乎其欲饗之也。

凡祭宗廟之禮。牛曰一元大武。豕曰剛鬣。豚曰膾肥。羊曰柔毛。雞曰翰音。犬曰羹獻。雉曰疏趾。兔曰明視。脯曰尹祭。烹魚曰商祭。鮮魚曰脰祭。水曰清滌。酒曰清酌。黍曰薺合。梁曰薺其。稷曰明粢。稻曰嘉蔬。韭曰豐本。鹽曰鹹醴。玉曰嘉玉。幣曰量幣。庶人春薦韭。夏薦麥。秋薦黍。冬薦稻。韭以卵。麥以魚。

黍以豚。稻以雁。月朔必薦新。

君再拜稽首。肉袒親割。敬之至也。稱孝孫孝子。以其義稱也。稱曾孫某。謂國家也。祭祀之相。主人自致其敬。盡其嘉。無與讓也。腥肆爛臠。不知神之所饗也。古者明君爵有德。而祿有功。必賜爵祿于大廟。示不敢專也。

凡賜爵。昭為一。穆為一。昭與昭齒。穆與穆齒。鼎有銘。銘者論謨其先祖之有德善功烈。勲勞慶賞。

聲名列于天下而酌之祭器自成其名焉以祀其先祖者也。顯揚先祖崇孝也。身比焉順也。明示後世教也。其先祖無美而稱之是誣也。有善而弗知不明也。知而弗傳不仁也。

文王之祭也。事死者如事生。思死者如不欲生。忌日必哀。稱諱如見親。祀之忠也。如見親之所愛如欲色。然祭之日樂與哀半。饗之必樂。已至必哀。祭之明日明發不寐。饗而致之。又從而思之。

祭祀之禮本紀四

郊社 告朔 山川 釋奠 蜡 雩 高禩

夏四月四卜。郊不從。乃免牲。猶三望。左傳曰：望，郊之細也。卜郊亦無望可也。胡傳曰：魯不郊而望，故特書曰：猶猶者，可以已之詞。僖公三十一年

春王正月。郊牛之口傷。改卜牛。牛死，乃不郊。猶三望。胡傳曰：乃不郊，為牛之口傷。改卜牛而牛又死也。不然，郊矣。牛不稱牲，未卜日也。宣公二年

九月辛丑用郊。胡傳曰：用者，不宜用也。或曰：蓋以人饗叩其鼻血以薦也。古者六畜不相為用。况敢用人。

乎。成公十七年

夏四月三卜郊不從。乃免牲。孟獻子曰。吾乃今而後。知有卜筮。夫郊祀后稷。以祈農事也。是故啓蟄而郊。郊而後耕。既耕而卜。郊宜其不從也。襄公十七年 麤鼠食郊牛。牛死。改卜牛。夏五月辛亥郊。定公十五年 春王正月。麤鼠食郊牛角。改卜牛。麤鼠又食其角。乃免牛。穀梁子曰。郊牛日展。斛角而知傷。展道盡矣。其所以備災之道不盡也。改卜牛。麤鼠又食其角。則亡乎人矣。非人之所能也。所以免有司之過也。有司免。

過。卽變異也。成公十七年

閏月不告月。猶朝于廟。左傳曰。閏月不告朔。非禮也。閏以正時。時以作事。事以厚生。生民之道。於是乎在矣。不告閏朔。棄時政也。何以爲民。胡傳曰。猶朝于廟。幸其不已之詞。文公六年 大雩。左傳曰。凡祀啓蟄而郊。龍見而雩。始殺而嘗。閉蟄而烝。過則書。胡傳曰。大雩者。雩于上帝。用盛樂也。桓公五年 山林川谷丘陵。能出雲爲風雨。見怪物。皆曰神。有天。

下祭百神。諸侯在其地則祭之。亡其地則不祭。
 大宗伯以血祭祭五嶽。以貍沈祭山林川澤。
 小宗伯兆五帝于四郊。四望亦如之。兆山川丘陵墳
 衍各從其方。
 天子祭天下名山大川。五嶽視三公。四瀆視諸侯。餘
 視伯子男。
 孟春之月。乃修祭典。祀山林川澤。
 仲冬之月。天子命有司祈祀四海大川。名源淵澤井
 泉。季冬乃畢山川之祀。

三王之祭川也。皆先河而後海。
 夏四月。猶三望。傳曰。天子有方望之事。無所不通。諸
 侯山川有不在封內者。則不祭。然則曷為三望。觸石
 而出。膚寸而合。不崇朝而遍雨乎天下。惟泰山河海
 潤于千里。故望。僖公三十一年
 仲春之月。上丁命樂正習舞。釋菜。仲丁又命樂正入
 學習樂。
 凡學春官。釋奠于先師。秋冬亦如之。行事必以幣。
 釋奠必有合也。有國故則否。

禮樂全編 卷之二十一 四十四
大司樂掌成均之法。以治建國之學政。而合國之子弟焉。凡有道有德者。使教焉。死則以爲樂祖。祭于瞽宗。

大胥春入學。舍采合舞。

天子大蜡八。伊耆氏始爲蜡。蜡也者。索也。歲十二月合聚萬物而索饗之也。蜡之祭也。主先嗇而祭司嗇也。祭百種以報嗇也。饗農及郵表畷禽獸。仁之至。義之盡也。迎貓爲其食田鼠也。迎虎爲其食田豕也。迎而祭之也。祭坊與水庸事也。曰土反其宅。水歸其壑。

昆蟲毋作。草木歸其澤。

八蜡以記四方。四方年不順成。八蜡不通。以謹民財也。順成之方。其蜡乃通。以移民也。旣蜡而收。民息已。故旣蜡。君子不興功。

子貢觀于蜡。子曰。賜也。樂乎。對曰。一國之人。皆若狂。賜未知其樂也。子曰。百日之蜡。一日之澤。非爾所知也。張而不弛。文武弗能也。弛而不張。文武弗爲也。一

張一弛。文武之道也。天子將出征。類乎上帝。宜乎社。造乎禰。禡于所征之

禮樂全編 卷之二十一 四十五
地受命于祖。受成于學。出征執有罪。反釋奠于學。以訊馘告。

曾子問曰。古者師行。必以遷廟主行乎。孔子曰。天子巡守。以遷廟主行。載于齊車。言必有尊也。

曾子問曰。古者師行。無遷主。則何主。孔子曰。主命。問曰。何謂也。孔子曰。天子諸侯將出。必以幣帛皮圭。告于祖禰。遂奉以出。載于齊車以行。每舍奠焉。而後就舍。反必告。設奠。卒。歛幣玉。藏諸兩階之間。乃出。蓋貴命也。

曾子問曰。喪有二孤。廟有二主。禮與。孔子曰。天無二日。土無二王。嘗禘郊社。尊于二上。未知其爲禮也。昔者齊桓公。亟舉兵。作僞主以行。及反。藏諸祖廟。廟有二主。自桓公始也。

大祝。大師。宜于社。造于祖。設軍社。類上帝。國將有事于四望。及軍歸。獻于社。則前祝。

天子命有司。犧牲告社。告所以征之事而受命焉。主車。主于中門之外。外門之內。廟主。居于道左。社主。居于道右。

司巫若國大旱帥巫而舞雩。
 仲夏之月命有司為民祈祀山川百源。大雩帝。用盛樂。乃命百縣雩祀百辟卿士。有益于民者。以祈穀實。建巳月雩五方上帝。名曰雩。祭于南郊之旁。命樂正習盛樂。舞皇舞。
 仲春之月。玄鳥至。至之日。以大牢祀高禴。天子親往。后妃帥九嬪御。乃禮天子所御。帶以弓韉。授以弓矢。于高禴之前。
 大宗伯。國有大故。旅上帝及四望。

小宗伯。大蕝及執事。禱祠于上下神示。
 凡天地之大蕝。類社稷宗廟。則為位。
 山川之神。則水旱癘疫之災。于是乎禱之。日月星辰之神。則雪霜風雨之不時。于是乎禱之。
 梁山崩。晉侯召伯宗。重人曰。國主山川。山崩川竭。君為之不舉。降服乘縵。徹樂出次。祝幣史辭。以禮焉。
 齊有彗。星。齊侯使禳之。晏子曰。無益也。祇取誣焉。天道不諂。不貳其命。若之何禳之。且天之有彗也。以除穢也。君無穢德。又何禳焉。若德之穢。禳之何損。

疾病乃行禱五祀。

女祝。掌王后之內祭祀。禱祠以時。招梗。檜。禳之事。以除疾殃。

男巫。春招弭以除疾病。

季春之月。命國難。九門磔。攘以畢春氣。仲秋之月。天子乃難以達秋氣。季冬之月。命有司大難。旁磔。

夏之興也。融降于崇山。其亡也。回祿信于聆隧。商之興也。禱杙次于丕山。其亡也。夷羊在牧。周之興也。鸞鳴于岐山。其衰也。杜伯射王于鄆。是皆明神之志。

者也。

鄭人相驚以伯有。曰伯有至矣。則皆走。或夢伯有介而行。曰壬子。余將殺帶也。明年壬寅。余又將殺段也。

及壬子。帶卒。國人懼。壬寅。段又卒。國人愈懼。子產立公孫洩及良霄以撫之。乃止。子太叔問其故。子產曰。鬼有所歸。乃不為厲。吾為之歸也。昭公七年

子產適晉。趙景子問曰。伯有能為鬼乎。子產曰。能。人生始化曰魄。既生魄。陽曰魂。用物精多。則魂魄強。是以有精爽。至於神明。匹夫匹婦強死。其魂魄猶能馮。

依於人。以爲淫厲。况良霄我先君穆公之冑。子良之孫。子耳之子。敝邑之卿。從政三世。其用物也。弘矣。其取精也多矣。其族又大。所馮厚矣。而強死。能爲鬼。不亦宜乎。昭公七年叔向問子產曰。寡君疾病。卜曰實沈。臺駘爲祟。敢問此何神也。子產曰。昔高辛氏有二子。伯曰闕伯。季曰實沈。居於曠林。不相能也。日尋干戈。以相征討。后帝不臧。遷闕伯於商丘。主辰。遷實沈於大夏。主參。其季世曰唐叔虞。有文在手。曰虞。遂名之。成王封太叔於

唐。故參爲晉星。由是觀之。則實沈參神也。金天氏有裔子曰昧。生允格。臺駘。臺駘能業其官。封諸汾川。沈姒。蓐黃。實守其祀。今晉主汾而臧之矣。由是觀之。則臺駘汾神也。昭公元年

五行之官。列受氏姓。封爲上公。社稷五祀。是尊是奉。木正曰句芒。火正曰祝融。金正曰蓐收。水正曰玄冥。土正曰后土。獻子曰。誰氏之五官也。曰。少皞氏有四叔。曰重。曰該。曰修。曰熙。重爲句芒。該爲蓐收。修熙爲玄冥。此三祀也。顓頊有子曰稷。爲祝融。共工有子曰

勾龍爲后土。此二祀也。烈山氏之子曰柱爲稷。自夏
 以上祀之。周棄亦爲稷。自商以來祀之。穀梁
 屈到嗜芰。有疾。召宗老屬曰。祭我必以芰。及祥。宗老
 將薦芰。屈建命去之。宗老曰。夫子屬之。子木曰。不然。
 夫子承楚國之政。其法刑在民心。而藏在王府。祭典
 有曰。國君有牛享。大夫有羊饋。士有豚犬之奠。庶人
 有魚炙之薦。籩豆脯醢。則上下共之。不羞珍異。不陳
 庶侈。夫子不以其私欲干國之典。遂不用。國語

四紀曲禮月令禮運禮器郊特牲玉藻祭法祭義祭
 統儀禮因事參用

